

Siunissami pisariaqartitsinerup qulakkeerpeqarnissaa siunertaralugu Iisimatusarfimmi ilinniarfeqarfiup illutaatalu annertusineqarneranni aningaasaqarnikkut allaffissornikkullu kingunerisassat misissorneqarnerannik imaqartumik nassuiaasiornissamik Naalakkersuisut peqquneqarnissaannik Inatsisartut aalajangiiffigisassaattut siunnersuut. Nassuiaammut atatillugu sukumiisumik misissorneqassaaq, danskit nunanilu allani aningaasaateqarfiit assigisaallu aningaasalersorneranut akuutinneqarsinnaanersut. Nassuiaat Inatsisartunut agguanneqassaaq 1. januar 2027 nallertinnagu.

(Demokraatit Inatsisartuni gruppiannit siunnersuut saqqummiunneqarpoq)

Akissuteqaat

(Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)

Aappassaaneerinnineq

Kultureqarnermut, Ilinniartitaanermut, Iisimatusarnermut Ilageeqarnermullu Ataatsimiititaliap suliaanut sukumiisumut isumaliutissiissutaanullu Naalakkersuisut qujassuteqarput.

Demokraatit aamma Inuit Ataqatigiit Ataatsimiititaliami ilaasortani amerlanerussuteqartut allannguutissatut siunnersuuteqarput, tassanilu aalajangiiffigisassatut siunnersuut erseqqissarneqarlunilu annertusineqarpoq.

Allannguutissatut siunnersuummi aalajangiiffigisassatut siunnersuut arlaqartunik allanngortinneqarpoq. Siunissami suliffeqarnermi ilinniartitaanermilu pisariaqartinneqartut matussuserniarlugit siunnersuutigineqartumi qulaajaanermi pineqassasut siullertut erseqqissarnerpoq. Tassunga atatillugu ilinniartitaanermi politikikkut aalajangiinerni tunngaviit pillugit ataatsimiititaliap oqaaseqaatai Naalakkersuisut maluginiarpaat, ilanngullugit kisitsisitigut kisitsisaanngitsutigullu misissueqqissaarnerit nunami tamarmi pisariaqartitsinermik erseqqissaassuteqartut. Pisariaqartitsinerup aqqissuussamik qulaajarneqarnerani suliap sivisunissaa ataatsimiititaliap oqaatigaa.

Qulaajaanermi allilerinermut aamma ilinniartut ineqarfiinut meeqquerivinnullu aaqqiissutissanik piviusunngortitsinermi periarfissat inassuteqaatinut ilaatinneqarnissaat, aamma qulaajaalluni nassuiaammut Suliniummut Uppik-mut atortut ilaatinneqarnissaat aappaattut taaneqarpoq. 1. januar 2027 nallertinnagu nassuiaatip Inatsisartunut agguanneqarnissaa aalajangiiffigisassatut siunnersuummi oqaatigineqarpoq. Allannguutissatut siunnersuummi 1. januar 2027-mi tamanna pereersimassasoq oqaatigineqarpoq.

Allannguutissaatut siunnersuummi oqaatigineqartunut ataatsimiititaliami ilaasortat amerlanerussuteqartut kissaateqartut Naalakkersuisut maluginiarpaat. Meeqquerivinnut aaqqiissuteqarnissamat tunngatillugu Naalakkersuisut oqaatigissavaat, tamanna imatut paasineqassamat Ilimmarfiup allilerneqarnissaanut pisariaqartitsinermik qulaajaanissaq kissaatigineqartoq.

Nassuiaammik tunniussaqaarnissamat killigitinneqartumut tunngatillugu tamatuma piviusorsuunnginnera Naalakkersuisut oqaatigerusuppaat. Aalajangiiffigisassatut siunnersuut UKA 2025-mi saqqummiunneqarnikummat oqaatigineqassaaq, qulaajaanerullu

suliarineqarnissaanut ukioq ataaseq pisariaqartinneqartoq naatsorsuutigineqarluni.
Siunnersuutilli oqaluuserineqarnissaa UPA 2026-mut kinguartinneqarpoq.

Maannakkut 2026 qeqqaniilernerput aamma siunnersuummut siullermit naleqqiullugu qulaajarneqartussap annertusineqarnera eqqarsaatigalugu Naalakkersuisut siunnersuutigaat siunnersuuteqartup piffissamik atuinissamik siunnersuuteqarnera allanngortinneqarani tunniussinissaq 1. juli 2027-mut kinguartinneqassasoq. Taamaattumik Naalakkersuisut allannguutissatut siunnersuummik saqqummiussippot, tassanilu ataatsimiititaliami amerlanerussuteqartut allannguutissatut siunnersuutigisaannit taamaallaat killiliussaqaq allaaneruvoq:

”Siunissami suliffeqarnermi ilinniartitaanikkut pisariaqartitsinissaq matussuserniarlugu Ilimmarfimmi ilinniarfeqarfiup illutaasalu allilernerqarneranni aningaasaqarnikkut allaffissornikkullu kingunerisassat qulaajaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Allilerinerup, ilinniartut ineqarfiinut meeqqerivinnullu aaqqiissutissat piviusunngortinneqarnissaannut aammalu aningaasaateqarfiit aqqutigalugit aningaasalersuinissamut periarfissat pillugit kaammattuutinik nassuiaat imaqassaaq. Uppik pillugu suliniummit atortut nassuiaammut ilanngunneqassapput nassuiaallu Inatsisartunut kingusinnerpaamik ulloq 1. juli 2027-mi agguanneqassaaq.”